

草庐吴文正公全集

華君吳文正公全集

草廬吳文正公集卷之三十六

墓表

前進士豫章熊先生墓表

先生宋咸淳甲戌進士第四人也授從仕郎寶慶府判
官不及仕而國運終常人壯歲取高科輒沾沾自喜得
之未幾而旋廢必怏怏自失先生不然當其得也不以
爲加及其廢也不以爲損處之裕如於是識趣過人遠
矣南服始附出野間有竊發弗可寧居徙家依城市躬
懷洒落態度寬和聞風者造門人人如煦春陽飲醇酎
而去莫不貌敬心服有所詢諮懇懇開示不倦中州士

大夫率令子弟受業朱子小學一書條分節解標註其
 事凡名物度數姓字稱號族繫時代一覽瞭然大有裨
 益於初學之士書市刻板廣傳令通行乎天下朝廷遣
 使定閩廣選士當路咸以名薦公議以為先生大儒師
 而東南士類之盛福吉其最遂命相繼任兩郡教官以
 擬安定胡公之蘇湖教官任滿部註將仕佐郎建安縣
 王簿族不赴其後再注從仕郎福清州判官致仕視之
 若浮雲然自號彭蠡釣徒日鼓瑟以自怡遠近來學益
 衆口講指畫俱通經能文貢舉制復門生悉堪應舉擢
 科者累累三科三省禮聘校文所貢大半成進士人羨

揀擇之精在宋用周禮義策士今制此經不與試士則
教人習禮記或漸沐其餘潤豈有明效博通群籍而禮
樂書教尤所研究每嘆詩樂無傳倣朱子所得趙彥肅
家二十四譜增二十詩俾皆可歌且謂朱子雖疑古樂
必非一聲協一字而猶存此聊見聲歌之彷彿然今之
音調縱不如古不猶愈於近世操弄詞曲爲樂哉嗚呼
此先生之深心殆猶逃虛空之喜聞足音也倘際議禮
制度考文之會幸次胡和阮李之問其庶幾禮樂豈出
諸君子之下也孔廟釋奠肇自唐開元禮宋政和禮因
之者也升歌之辭多闕江南學宮配享有四而酌獻舊

辭止有顏孟所在因循苟簡仍以侑顏孟者侑曾思爲
是更譔新辭補所不備春秋各按月律合調迎神至迭
神通十八曲部使者以之遍行于諸郡惜哉此學此志
不獲顯設臺閣名流若程鉅夫若元明善屢言於朝時
未及用所譜諸詩考槃兼葭衡門白駒一皆寓自足已
樂不斲人知之意賦又假瑟以喻不無金罍子期之慨
焉平生著述有小學書標註有瑟譜有文集三十卷其
存觀此可以見所學之大槩矣家世豫章熊氏諱朋來
字與可學者稱天慵先生配袁氏前卒子三父命以永
先爲長子象先俱袁出也繼室何生古孫七昶昱昇昉

寅富壽年七十八至治癸亥五月壬寅卒十二月壬申
合葬袁氏墓右江西行省參政廉惇自初喪至葬親臨
哀送如弟子禮遠近會葬千餘人明年自翰林直學士
虞集銘其碑越六年古來徵文表墓嗚呼予疇昔與先
生談論不舍晝夜深知其學之奧故特書予之所知而
凡前碑已載者弗瀆

故萍鄉州儒學教授聶君墓表

君諱斗月字文範清江崇學鄉聶氏平山居士思清之
孫將仕佐郎餘姚縣主簿應泰之子博綜群書辭藝超
衆宋咸淳癸酉江西轉運司以進士貢于禮部國朝既

臣南土民未諳新政姦黠並緣乘時漁獵舊族徃徃困
瘁獨君才識通敏應事適宜見者心服莫或敢侮旣克
自立同里與受庇幬至元壬辰劇盜猝至質人以求貨
君納重賂見免其母身留賊中凡同時被繫之人悉意
調膈盡脫乃已越境數日而後返其拯難誠切臨危不
懾有如此者由是買宅于洪奉母而居會府人物淵海
縉紳宦游雲萍旅寄莫不就見而問政欵門而締交一
身仰而糊口者有焉一家待而舉火者有焉接納彌久
不倦大德庚子復還先廬錄前人貲產及已所增殖均
畀諸弟當路薦君文行勅授袁州路萍鄉州儒學教授

至大戊申之春得未疾弗克赴君儀刑端莊氣象純雅
敦謹和裕表裏不二斷斷然有古鄒魯遺風孝於大父
若父若母養生送死一一如禮敬長慈幼好賢容衆賑
貧賙急救患平怨宗族親眷友朋鄉黨睦姻任恤之行
靡有虧缺慧智明達而深潛掩抑守之以愚因自號守
愚以寓其志後進稱曰守愚先生生宋淳祐丁未三月
朏終元延祐丁巳十一月朏越三年己未正月庚申葬
富州富城鄉之緱山配黃氏子男四克勤後二年歿次
克潛克讓爲弟斗元歸季克修女一黃武黃允恭壻也
孫男一德符女三旣葬之八年予過清江克潛示以將

仕卽前遼陽等處儒學副提舉李克家之狀請銘先德
予夙昔與君交游思君篤行不可復見葬已久矣銘無
所施乃爲叙次其狀之所述而以表于墓初餘姚主簿
年壯未毓子平山先生素尊事翰林學士豐城徐公一
日客其門值公之從弟携中子偕來卽斗月也居士一
見其竒秀偉欲求之爲孫以情白徐公公可其請命從
弟以此子與聶而主簿子之其後主簿生四男及諸女
君友愛篤甚一如同出父喪弟妹猶稚鞠之長之教之
各使成才嫁之各使得所仲弟斗韓擢惠州路儒學教
授諸弟感覆育恩事兄終其身如事父又恢拓其家業

茲光大其家聲人咸服居士遠謀而嘉君之善爲人子
無忝付託云

故延平路儒學教授南豐劉君墓表

南豐之鎮曰軍山峻削聳特上逼霄漢山靈所鍾宜產
竒傑而唐以前無聞逮宋之盛曾子固文章磅礴萬古
真可爲茲山配神氣龐鴻意其鬱發而無盡訖宋之世
科舉之藝擅名者數數有而曾之躅未或繼也宋季接
國朝混一之初南豐之彥有若諶祐自求有若劉堦起
潛各以詩文鳴然皆沉晦于下儻俾生慶歷嘉祐間獲
承六一翁鏘範安知其不參子固而三乎諶入國朝時

年踰六十又二十餘年至大德戊戌八十六而終終身
無成劉少謙二十七歲才氣等埒每自相推許方起潛
之在宋已卓犖不羣邑正長郡守倅及鄉先達莫不期
以遠大年三十七而宋亡時世人情兵謀地利素所諳
練比來鉅公間以事接聽其言論甚噐重焉竟亦落落
不偶郡庠缺官當路交薦年五十五始署盱郡學正年
七十受朝命爲延平郡教授其教於兩郡也繩檢諸生
作古文廟屋修完學務振舉視食焉怠其事者迥異延
平官滿旣代諸生不容其去復留授業者三年乃歸歸
四年延禧己未也年八十矣後八月七日晨興進飯一

七端坐而逝初殯華野泰定丙寅九月庚申塋廣昌縣
文教里之塔岡劉氏世爲儒家其先唐末濠州刺史金
生清淮軍節度使劉仁瞻節使生懷州刺史崇讚懷州
之孫建康通守昭建康之孫著作卽用滋著作之元孫
寧遠縣丞諱從畢是爲曾大父大父諱炎父諱岩母揭
氏起潛事母篤孝樂爲義舉厚朋友恤貧困拯人於患
難心所至不顧已力之何如研經究史網羅百氏文思
如湧泉所著有經說講義水雲村藁泯藁哀鑑英華錄
隱居通義凡百二十五卷曾文定公墓祭以廢典鄉校
日率諸生以暮夜行禮如初抑其心所尙友者耶娶傅

先十七年卒子男三龍瑞亦先卒麟瑞鸞瑞孫男二曾
孫男二麟瑞走二百四十里詣吾門請表父之墓予於
起潛前聞其名後見其文今觀長興州判官許晉孫所
狀益嘆其時命之不與才志合於是表其所可傳以示
方來使其可傳於人者苟有傳則其不可得於天者固
無憾也已

墓誌銘

樂安縣丞黃君墓碣銘

乙亥之冬郡旣降下諸縣索降狀樂安令率其僚聯署
以上丞黃君獨不往令遣吏促之方對語云云吏迫之

不動白令令怒俄而吏民數百人集于庭強與致君顛
踏于地若卒中然衆粹踣詬詈且曰爲是不順將召兵
累我民君佯死爲不聞令無如之何同它僚署名應郡
命君有惠愛在民旣暮憐之者舁入寘中堂蓐處地上
盪旦或飲以粥氣少續越三日家之人始來視遷就榻
面壁卧旬餘新領郡事者分遣新官治所屬一郡吏來
丞樂其人素敬服君廉正又見府積緡錢甚富諸器物
不如故可爲已有以此德君用交承之禮接待力覆護
爲言于郡郡檄召不赴則檄攝縣事亦辭全身以去與
家人完聚爾後連歲盜起挈家辟地靡寧僅定廬于巴

山之下日務治圃觀書年七十一乃終辛卯十一月二十日也君隆州井研縣人諱申字酉卿弱冠以春秋義貢禮部比壯再貢戊午出蜀依叔父于南康旅且貧急就祿已未廷試對策特奏名授迪功郎江州德安尉嘗滿轉修職郎撫州樂安丞需次閑居當路命攝縣主簿州司理又兼提點刑獄事多所辨明冤者獲伸樂安之政廉謹如初以恩陞從事郎丞相江公萬里提刑黃公震宋末號名人不輕許可者稱君堅壁禦貧明潔無私其言足徵云蓋惟怯於利者能勇於義君嘗與予言蜀被兵時一守臣先出其帑榜其門曰一身留許國諸子

用傳家其年將變君悉遣家人遠避而身自留于官借
予一力給使分擾之際亦迺惟一夫隨君作傳紀其事
夫人羊氏繼韓氏先八年卒子四人賁孚革蒙女子一
人歸權大元至元二十九年壬辰十月癸丑葬崇仁宜
風之孔陂原君鄉人同知撫州路總管府事眉山史侯
銘墓弗稱賁請更之以刻于墓門予驟辭請愈力乃銘
曰

利之闡截截義之玦揭揭維潔不涅維節不折衆爾憒
憒獨厲烈烈不裂不缺有官斯碣

秋堂陳君士墓銘